

USU CONSUTUDINARIU N'ASTURIES DE DELLES PLANTES MELECINABLES

Dr. Francisco Jesús Fernández-Guisasola Muñiz

guisasola@asturmed.org

Resumen

Se realiza una recopilación de trabajos de campo en los que distintos autores preguntaron a ancianos de los concejos de Asturias sobre el uso que en sus pueblos se hacía de las plantas como medicinas.

Palabras Clave

Etnomedicina. Plantas Medicinales. Asturias.

L'envís d'esti trabayu ye recoyer dellos usos melecinables que los asturianos hicieron, dende peronia, de floritos, yerbas y árboles qu'abenayá pueblen asgaya'l terrén d'Asturias. Delles vegaes nun van ser los mismos que tán nos trataos botánicos pero toos vienen de ser recoyíos por muchos autores n'alcordanza d'homes y mujeres d'esta tierra.

Al rodriu de les plantes melecinables n'Asturias, paez que solo somos a falar de la **cirigüeña** ("la cirigüeña de tolos males ye dueña"), la **ruda** ("la ruda tolos males cura") o la **lluisa** ("fueya y flor de les lluisales pon remediu a siete males") pero hailes abondo. Sicasí, nun habemos poneles ensemble pos diben ser demasiaes.

Dotramientre les malures cuantisimayá tampoco nun yeren nomaes como agora y delles vegaes ye perdifícil saber de fixu a qué diagnósticu nosolóxicu corresponderíen güei les llaceríes que cuentan los güelos nos conceyos. Sicasí, prestarianos falar de tolos amalecimientos relataos pero, por tamañu d'esta esposición, tenemos de nomar sólo un mizcu.

Ferides, cortadures, hinchones, chinches y mancadures

Nel cursu'l trabayu, nel campu, nos talleres... y na vida cotidiana nes aldees y pueblos d'Asturias yera perfrecuente que los paisanos y les paisanes se mancaran; asina que ye lóxicu que lo más nomáu en toes les entrevistes feches pelos muchos autores que se dedicaron a dir entrugando remedios per Asturias seyan dellos tratamientos pa ferides, cortadures, hinchones, chinches y too tipu mancadures.

La planta más nomada pa guarir toes les toyedures ye, ensin dubia la **cirigüeña**. La **cirigüeña** ye una planta perenne que medra ente 30 y 80 cm d'altura, —tien flores amariellas que florian de mayu a setiembre— y guaña abondo per tol territoriu'l Principáu. Igual ye por eso polo que se fala d'ella per toa Asturias. Les más de les veces usábase'l zumu direutamente

(el so usu tá recoyío, entre otros, nos conceyos de Proaza, Piloña, Cangas del Narcea, Uviéu, Cabranes o Miranda), pero otres vegaes amestábase con dalguna otra planta como l'**ayu o'l bálsamu**. Asina, en Candamu tá recoyiu que pa los golpes usábase la cataplasma d'ayu machucao col zumu la **cirigüeña** y en Cangas del Narcea contaben que pa les mancadures machucábense n'agua **cirigüeña y bálsamu** (llieu añadién aceite y facien asina una pomada que yera lo que -y ponien a la toyedura). El **bálsamu** usóse tamién él sólu, por exemplu, nel conceyu d'Ayer: escaleciénlo, quitaben-y la piel de perbaxu y ponienlo perriba les cortadures.

Sicasí, munches otres plantes foren usaes n'Asturias pa guarir ferides y mancadures. Asina, en Miranda recóyise l'uso la **llanzuela** machucao y en Uviéu cuenten que ponen el caldu que sueltan les sos fueyes al cocer. Tamién nel conceyu Uviéu usóse la **colorada** machucao y puesto n'emplastu. La **pata paxarín**, machucao y colao, usóse en Pravia, mientras qu'en crudo faciéndo en Illas y Miranda. Conceyos Iloñes como Ayer y Cangues d'Onís llavaben les ferides col agua cocer les fueyes de la **nozal** (la que nun da frutu), mientras qu'en Corvera les llavaben col l'agua cocer la flor del **xabú**. En Sosbrescobiu les ferides llimpiábense col l'agua cocer **llantosil**, lo mesmu qu'en Piloña, ónde cocien la raíz; sicasí, nel conceyu d'Ayer, les ferides puerques llavábenles con **xurbia**. En Tinéu usaron cataplastames de **calabazón**; en Ponga, de **balsamina** y en Grau, d'**arzolla**; tamién s'usaron en dellos conceyos cataplasmes de **malva** y de **romeru**.

La **consolda** usóse per toa Asturias pa torcedures y soldar güesos ("la consolda tolos güesos solda"). Asina, por exemplu, en Llanes ta recoyío que la cocien, sola o con **llantosil**, pa poner cataplasmes. Y, tamién pa les torcedures, per Siero machucaben **ortigues** con agua y sal; per Ayer facien lo mesmo pa los güelpes, pero en fervinchu en cuenta machucao.

Pa finar esti apartáu, dos *fórmules maxistrales* yeren: la úna, el **polvu d'apiu**, metíase un puñao nún llitru d'agua, dexábase ferver y, llieu, al templar l'agua, secábase al fornú pa desecalo y, dempués, machucábase nun morteru; la otra nun llevaba plantes: amestábase aceite d'oliva, sebu carneru, pez negru y cera virxe, cociasi too, colábase y resultaba una pasta con la que s'untar nes mancadures.

Duviesos, granos, gorguyos, malucos y cabruncos

Munches plantes usáronse en cataplasmes p'arreventar los duviesos y gorguyos, la que más, la **cebolla**; pero lo principal

Yera que teníen que tar escalecías. La **cebolla**, nel conceyu Carreño, por exemplu, calentábase nun cazu con aceite. En Cabranes, ensin embargu, amarraben namás los cascos de la **cebolla** encima'l d'uviesu, p'arreventalu; lo mesmo en Ayer, ónde enantes sí que los escalecien.

Otro remediu mui usao foi'l **sombreru'l sapu** (los **sombrerinos**). En Candamu y Carreño cuenten qu'escalecienlos na chapa la cocina, despegaben-yos la telina que tienen en perbaxo y poníenla enriba los d'uviesu p'arreventalos.

Tamién cuenten en dellos conceyos qu'usaben la fueya'l **bálsamu**: en Illas despegaben la telina fina que tienen les fueyes en perbaxo y poníenla perriba del cabruncu p'arreventalo; nel conceyu d'Ayer, lo mismo pero enantes escalecienles. En Candamu, cocién en agua rames de les **malves** y facién una cataplasma, malque delles vegaes sólo escalecien les fueyes. Per Allande yera l'**arzolia** la que cocién pa llavar los granos con esi agua y per Grau yera la **yerba coralina**. En Candamu poníen un **ayu** caliente. Per Xixón escalecien les fueyes de la **llanzuela** con un tizón y poníenles d'emplastu; per Quiros y Les Regueras, ensin embargu, echaben-y aceite perriba enantes d'escaleceles na cocina pa facer l'emplastu. En Colunga calentaben col alientu la fueya'l **carrastellar**, esfregábenla coles manes pa ponela sele, y poníenla aviesu sobre'l d'uviesu. Otra planta usada pal malucu foi l'**oriéganu** que nel conceyu d'Ayer poníenla nuna cataplasma fecha con miel.

Pa finar, en Villayón usaben **paya** fervida pa los uñeros.

Verrugues y otros malures de la piel

Pa les verrugues lo más usao foi, de xuru, el xugu la **cirgueña** (ta recóiu por exemplu nel conceyu Ayer), mal qu'en abondos conceyos (Villayón o'l mismo Ayer) untábenles a más col llechi'l **figu**. En Llена cuenten qu'usaben l'**arzolia** y en Grau, la **yerba coralina**. En Ayer usóse tamién el xugu'l **llimón**.

Pal percebún (nomaben asina cualesquier dermatosis tórpida) nel conceyu d'Ayer usaben la flor del **xabú**, con mantega fresco o con miel, y les cereces de **gamoncillu**.

P'alcuentera la culebrilla (herpes) poníense pomades feches con, entre otras plantes, **lloréu** o **xabú**.

Gafancies y carecimientos infeliciosos

Si la **cirgueña** yera la reina la piel, pa les malures internes lo yera escurque l'**apiu**; asina, en Piloña dizse: "*Ties el neñu muertu y l'apiu nel güertu*" y en Ayer "*l'home muertu y l'apiu en güertu*". El fervinchu d'**apiu** bebíase per toa Asturias pa baxar la temperatura, malque delles vegaes usóse tamién, machucao, en cataplasmes puestos nel sobacu; nel conceyu d'Ayer, machucábase con mantega y esfregaben col amiestu tol cuerpu. A más l'**apiu** tamién usábase xintao: en sopa o con llechi.

La temperatura, a más de col **apiu**, intentaba baxase con ferviatos de corteza de **salguera** o con fervinchos de fueyes de **fresnu**, de **chazaina** o d'**artemisa**. Usóse tamién l'**ablanu**. De la temperatura diciése: "*calentures otoñales: o mui llargues, o mortales*" y "*calentures de mayu, salú pa tol añu*".

Les malures de la respiración: trancazos, catarros y afuegos, yeren a tratase sudando y pa ello usábense bebíes

alcohólicas (oruxos y sidra) y ferviatos —delles vegaes con miel o con zucré— de distintes plantes. Asina, en Cabranes tomabien ferviatos d'**oriéganu** y en Cangues d'Onís amestabien l'**oriéganu** con **ocalitu**, flor de **malva** y **manzaniella**. Esta, la **manzaniella**, en Cabranes freyíenla pa tratar el catarru. Tamién per Cabranes y Colunga, pal catarru, tomabien fervinchos de **xabú** con llechi. En Cangues del Narcea, si'l catarru yera mui fuerte, bebíen **cirgueña** con miel. La **malva** tomóse pal catarru, en ferviatos, per toa Asturias (bien sola, bien amestada con **oriéganu** o **romeru**). Los vaqueiros de Llена tratabien el catarru col **brúncanu**. A más de tomalos en fervinchos, per toa Asturias faciense vafos de muchos floritos: **cirgueña**, **chazaina**, **regaliz**, **malva**, **cenoyu**, **ortigues**, **apiu**, **oriéganu**, flor de **xabú**, etc. Nel conceyu d'Ayer faciéndose esti xarabe pal catarru: cuartu kilo **figos**, mediu lilitru vinu blancu, media **mazana**, media **naranxa** y cuartu kilo zucré, to ello cocío a fueu llentu.

Pa les anxines lo que se facía yeren gárgares de delles plantes: de **llanzuela** (en Somiedu y Miranda), de **cirgueña**, o de **malvariscu**. Tamién, delles vegaes, poníense cataplasmas dalguna d'elles nel gargüelu.

La ronquera tratábenla con vafos: d'**oriéganu**, d'**ocalitu** o de **malva**; y, tamién, con gárgares d'estes mesmos plantas, de **llanzuela** o de **colorada**. Tamién, con ferviatos d'**ocalitu** y yema güevu o de **romeru** con chocolate.

La tosferina (tamién nomada agullu o llandra), en Gozón trabase tomando xugu de **pata paxarín** machucáu, sicasí en Cabranes comien **figos**.

El dolor

Ún de los peores sufrimientos del ser humano ye, en sin dubia, el dolor de mueles que davezu yera a tratase con delles plantes, pero que si nun -yos pasaba, obligaba a dir al **sacamueles**. En Cabranes tomabien **malves** o poníen cataplasmes de **salváu** nos pies. En Cangues d'Onís poníen nel papu una cataplasma de flor de **xabú**. En Pravia frotaben l'enxiva col agua ferver **llanzuela**. N'Ayer cocién flores de **pericón** y, llueu, metíenles nun tarru con aceite d'oliva que dexaben 40 dies na tierra al sol; si menguaba echaben-y más aceite; esti ungüentu yera'l que poníen nes enxives con cuenta quitar el dolor. Tamién usaben cataplasmes d'**ayu**.

En Candamu, pal dolor d'oyíos, poníen na oreya una michina **ruda** frita n'aceite, sicasí en Cabranes poníen solo l'aceite escaleciú.

Pal dolor de barriga usábense per toa Asturias los ferviatos: davezu yeren d'**anisinos** o de **manzaniella** (asina cuéntanlo, por exemplu, en Cabranes) o de **nielda** (contáronlo nel conceyu d'Uviéu), ayures en Casu dábense fregues de mantega, **apiu** y ceniza.

Nel dolor de testera usáronse emplastos de **Lluisa**, de **ruda**, de **beleñu**, d'**ortigues**, de **yedra** y, tamién, rodaxes de **pataques**.

Pa la cerviguera o tortículis, nel conceyu d'Ayer untaben el mismo ungüentu de **pericón** qu'usaben pal dolor de mueles.

Pal reuma y el llumbagu davezu s'usaben les **ortigues**. Asina, en Salas cuenten qu'esfregaben ónde dolía con **ortigues**, pero que "*moyábenles enantes n'agua pa que nun salieren ronches*".

Nome	Nómina internacional	Nome	Nómina internacional
Abeyera	<i>Melissa Officinalis L.</i>	Madruéñu	<i>Arbutus Unedo L.</i>
Ablanu	<i>Corylus Avellana L.</i>	Maízu	<i>Zea Mays L.</i>
Acebú	<i>Ilex Aquifolium L.</i>	Malva	<i>Malva Sylvestris L.</i>
Anisinos	<i>Foeniculum Vulgare Miller.</i>	Malvariscu	<i>Althaea Officinalis L.</i>
Apiu	<i>Apium Graveolens L.</i>	Manzaniella	<i>Matricaria Recutita L.</i>
Arandanera	<i>Vaccinium Myrtillus L.</i>	Naranxa	<i>Citrus Sinensis (L.) Osbeck</i>
Arfueyu	<i>Viscum Album L.</i>	Nielda	<i>Calamintha Sylvatica Bromf. o Mentha Piperita L.</i>
Artemisa	<i>Artemisia Vulgaris L.</i>	Nozal	<i>Juglans Regia L.</i>
Arzolia	<i>Peltigera Canina (L.) Willd</i>	Ocalitu	<i>Eucalyptus Globulus Labill.</i>
Ayu	<i>Allium Sativum L.</i>	Ocle	<i>Bifurcaria Bifurcata Laminaria Cloustoni Laminaria Flexicanlis Laminaria Naccharina Hyalienia Bulbosa</i>
Balsamina	<i>Salvia Verbenaca L.</i>	Oreya llebre	<i>Stachys Lanata Jacques</i>
Bálsamu	<i>Sedum Telephium L.</i>	Oriéganu	<i>Origanum Vulgare L.</i>
Beleñu	<i>Hyoscyamus Niger L.</i>	Ortigues	<i>Urtica Dioica L. o Urtica Urens L.</i>
Brúncanu	<i>Lingisticum Lucidum Millar.</i>	Pata paxarín	<i>Arnica Montana L.</i>
Calabazón	<i>Cucurbita Pepo L.</i>	Pataquera	<i>Solanum Tuberosum L.</i>
Capellán	<i>Equisetum Telmateia Ehrh. o Equisetum Arvense L.</i>	Peonía	<i>Paeonia Officinalis L.</i>
Carbayu	<i>Quercus Robur L.</i>	Pericón	<i>Hypericum Perforatum L.</i>
Carquexa	<i>Chamaespartium Sagittale L.</i>	Pescal	<i>Prunus Persica L.</i>
Carrastellar	<i>Cornus Sanguinea L.</i>	Pumar	<i>Malus Domestica Borkh.</i>
Castañal	<i>Castanea Sativa Millar</i>	Rabu raposu	<i>Equisetum Telmateia Ehrh. o Equisetum Arvense L.</i>
Cebada	<i>Triticum Sativum Lam. o Hordeum Murinum L.</i>	Regaliz	<i>Glycyrrhiza Glabra L. o Astragalus Glycyphyllo L.</i>
Cebolla	<i>Allium Cepa L.</i>	Restallón	<i>Digitalis Purpurea L.</i>
Cenoyu	<i>Foeniculum Vulgare Miller.</i>	Ricín	<i>Ricinus Communis L.</i>
Centaura	<i>Centaurea Nigra L.</i>	Romeru	<i>Rosmarinus Officinalis L.</i>
Centén	<i>Secale Cereale L.</i>	Roses	<i>Rosa Canina L.</i>
Chazaina	<i>Gentiana Lutea L.</i>	Ruda	<i>Ruta Chalepensis L.</i>
Cirigüeña	<i>Chelidonium Majus L.</i>	Sabugu, Benito	<i>Sambucus Nigra L.</i>
Colorada	<i>Geranium Robertianum L.</i>	Salguera	<i>Salix Alba L.</i>
Consolda	<i>Ajuga Reptans L.</i>	Sen	<i>Cassia Acutifolia Delile</i>
Corzonela	entovía nun identificada	Sombreru'l sapu	<i>Umbelicus Rupestris Dandy</i>
Escanda	<i>Triticum Spelta L.</i>	Tártamu	<i>Pinguicula Grandiflora Lamk</i>
Felechu	<i>Polypodium Australe Fée</i>	Te	<i>Thea Sinensis</i>
Ficaria	<i>Ranunculus Ficaria L.</i>	Texu	<i>Taxus Baccata L.</i>
Figar	<i>ficus Carica L.</i>	Tilar	<i>Tilia Platyphyllus Scop.</i>
Fresnu	<i>Fraxinus Excelsior L</i>	Trigu	<i>Triticum Sativum Lam.</i>
Gamoncillu	<i>Asphodelus Cerasiferus Gay.</i>	Xabú(gu)	<i>Sambucus Nigra L.</i>
Gorbiz	<i>Daboecia Cantabrica L. Koch. o Calluna Vulgaris (L.) Hull.</i>	Xurbia	<i>Veratrum Album L.</i>
Llantosil	<i>Osmunda Regalis L.</i>	Yedra	<i>Hedera Helix L. o Viscum Album L.</i>
Llanzuela	<i>Plantago Major L. o P. Lanceolata L.</i>	Yerba coralina	<i>Arrhenatherum Elatius L.</i>
Llimoneru	<i>Citrus Limon L.</i>	Yerba N.º S.º	<i>Erodium Moschatum L.</i>
Llingua perru	<i>Cynoglossum Creticum Miller</i>		
Llinu	<i>Linum Usitatissimum L.</i>		
Lloréu	<i>Lauris Nobilis L.</i>		
Lluisa	<i>Lippia Citriodora Palau</i>		

Tabla 1.- Nómina Internacional de les plantes melecinables d'Asturies nomaes nel testu (n'urden alfabetico).

Nel conceyu d'Ayer pal reuma comién **ayu** n'ayunes o tomaben ferviatos de fueya'l **fresnu**, o de **carquexa**, la que tamién usaben en baños, como facíen col **romeru**, l'**ocle**, la **nozal** o la **balsamina**.

Pa los dolores de les mujeres la planta reina yera, en sin dubia, la **ruda**, davezu xintada. Asina en Illas xintábenla en caldu o con chocolate y en Candamu en tortiella francesa (mal qu'ellí tamién mazcábenla en crudu pa llueu escupila). Sicasi tamién facíen con la **ruda** vafos (asina contáronlo en Pravia).

Otres plantes que s'usaron pa los dolores de la regla foren: la **ortiga**, qu'en Coaña tomábase fervía, la **nozal** (d'esta

poníense les fueyes como emplastu nel ombligu) o la **lluisa**. Nel conceyu d'Ayer facíen emplastos d'**abeyera** y tomaben ferviatos de **nielda** o de **cenoyu**.

Malures dixestives

Los amalecimientos dixestivos que se trataben de cutiu yeren la foria, el torzón, l'empachu, l'alferencia y les llombries.

El purgante más afamáu yera, de xuru, el **tártamu** y asina lo mesmo en Quirós qu'en Piloña cuenten que con unes gutines del xugu de machucalo valía pa soltar el vientre. En sin embargu, nel

Nome	Parte la planta
Ablana	Frutu l'ablanu
Arándanu	Frutu l'arandanera
Figu	Frutu la Figar
Llimón	Frutu'l Llimonero
Llinaza	Semiente'l llinu
Mazana	Frutu la pumar
Naranxa	Frutu la naranxal
Nuez	Frutu la nozal
Pataques	Tubérculu la pataquera
Paya	Tallu secu del trigu o la escanda
Salváu	Poxa del trigu o del centén
Tila	Fueya'l Tilar

Tabla 2.- Dalgunes partes melecinables de delles plantes nomaes nel testu.

conceyu d'El Franco cocien la raíz de la **corzonela** y en Ayer usáronse los ferviatos de **manzaniella** y de **nielda**. Otros fervinchos usaos yeren d'**acebu**, de **fresnu** o de **sen**. Tamién s'usaben dellos xarabes: de **mazana**, de **figu**, de **nueces** o d'**ablanes** y, tamién, aceite **ricín**.

Pa la foria (tamién nomada esforia, cagalera o cagueta) cuenten en Navia y en Llanera qu'usaben l'agua de cocer la corteya'l **carbayu**, malque en Riosa yera la flor de la **gorbiz** la que cocien y en Cabranes la flor del **cenoyu**. Tamién usóse l'agua de cocer la flor de la **castañal**, del **madrueñu**, de la **xurbia**, y los tópicos agua de té y agua de **llimón**.

L'empachu tratábbase con ferviatos de **manzaniella**, de **lluisa**, d'**abeyera**, de **chazaina**, de **nielda**, de **té**, de **xabú** o de **ruda**.

Pal torzón (retorzón, retortiyón o tarazón) poníense na barriga cataplasmes de fueyes de **malva** y farina **llinaza**. D'otra miente, bebiense fervinchos d'**anisinos**, de **xistra** o de raiz de **felechu**. En Llena usábase la **ruda** y en Casu l'**apiu**. Tamién usóse delles vegaes la **nielda**.

L'alferecía de los neños tratábbase dafechu con la **peonía** (en Candamu cuenten que facian un xarabe cociendo la con zucré), mal qu'en Villaviciosa dabien-yos a los guah.es un ferviato de **cenoyu**. Usóse tamién la **manzaniella** y tol mundu falaba del **arfueyu**, sicasí, ya nel sieglu XVIII, el Dr. Casal comprobó que nun valía pa curala.

Pa les llombrices usábense auquier les pipes de **calabazón** y l'**ayu** (un diente d'**ayu** machucao, dexao a serenar pela nueche nun vasu llechi y tomándolo n'ayunes 9 díes siguios). En Villaviciosa y Cabranes tomábbase un fervinchu d'**apiu**; tamién en Cabranes usóse'l fervinchu de les fueyes de la **pescal**; lo mesmo qu'en Carreñu, que bebién l'agua que suelten eses fueyes. Tamién usóse delles vegaes el **xabú**. Pa la llombriga lata (la solitaria) cuenten en Grau que tamién dabien les pipes de **calabazón**.

Pa finar esti apartáu, dicir que les úlceras d'estómagu tratábense davezu per toa Asturias con ferviatos de **cirgüeña**. Les almorranes tratábense en Ayer con baños d'asiento de cocimientos de la mesma **cirgüeña** o con fervinchos de corteza **carbayu**, de **salguera** o de **ficaria**.

Malures de los güeyos

Los güeyos coloraos llavábense davezu con ferviatos de **cirgüeña**, de **llanzuela**, de **malves**, de **xabú**, de **cenoyu** o de **manzaniella**. En Llanes y Colunga fervíen el **xabú** pa llavar los güeyos o la boca malos. Y nel conceyu d'Ayer usaben l'agua de les **roses**.

Los orzuelos tratábense col **ayu**, la **cirgüeña** o'l **trigu**.

Malures de mujeres

Nel apartáu del dolor falóse ya de la dismenorrea, asina qu'equí tenemos de falar sólo de les otres malures de la mujer. En Cabranes pa que baxara la regla cocien **nielda**, pero tamién usáronse en dellos conceyos los ferviatos de **texo** o de **lluisa** y, tamién, emplastos nel baxo vientre d'**artemisa** machucao.

Pa les metrorraxies usáronse ferviatos d'**ortigues**, de **carbayu** o de **cirgüeña** (que tamién aplicaben na barriga).

Pa la leucorrhea tomaben cocimientos de la fueya la **nozal**. La mastalgia tratábase con **balsamina** y les grietas nos pezones col agua de **manzaniella**.

Tamién ta dicho que pa subir el llechi ponien na teta emplastos d'**apiu** machucao.

Otros amalecimientos

Pa finar esta recopilación, na más que nomar otros plantes usaes en dellos amalecimientos. Cuenten en Cabranes que pa los ñervios cocien **lluisa** y **tila** y pa mexar, **rau de raposu** (**capellán**). En Ayer, pa mexar, tomaben l'agua de cocer 9 **cebollas** y tamién usaben l'**ayu**, el **maízu** o la **cebada**.

Pa matar los pioyos n'El Franco usábase l'agua cocer rames de **texu** y en dellos conceyos l'agua cocer **xurbia** (en Santiso d'Abres cuenten que la usaben tamién pa la sarna).

Par corazón y la tensión en Salas tomaben fervinchos de flor de **fresnu** y en Pravia y Llena, l'agua cocer la fueya l'**arfueyu**. En Ayer usáronse'l **restallón** y la corteza'l **texu** pal corazón y ferviatos de **maízu**, de **capellán**, d'**oreya llebre** o de **llingua perru** pa la tensión.

En Proaza contaben que teníen de beber l'agua de ferver **ocle** de la mar pal bociu. A más, delles vegaes usóse'l ferviato de fueya l'**arándanu** o la **centaura** pa tratar la diabetes.

Pal cáncer, en Tinéu usáronse les fueyes y les flores del **arfueyu** y en Ayer ponien **cirgüeña** nel mesmo cáncanu.

L'uso d'estes plantes melecinables nos conceyos nomaos ta perfectamente documentao na bibliografía d'esti trabayu (porque daquién contó-yoslo a los autores) lo que nun quier decir que nun fueran a usase n'otros conceyos, malque tovía nun tea recogío. Ye d'agradecer a tolos que hicieron trabayos de campo, entrugando a los güelos per toa Asturias, la so dedicación, ensin embargu hai que decir que queda entovía muncho trabayu por facer y mui pocu tiempu enantes que s'escaezan pa siempre los remedios del pasáu. ■

Bibliografía

- ACADEMIA DE LA LLINGUA ASTURIANA (2000). *Diccionariu de la llingua asturiana*. Uviéu: KRK ediciones

2. ALVAREZ PEÑA, A. (2004). *Melecina máxico-tradicional n'Asturias*. Xixón: VTP Editorial.
3. ALVAREZ PEÑA, A. (2005, 8 de marzo) "La tiraña". *La Nueva España* (Nueva Quintana). Oviedo.
4. ARGUMOSA Y VALDÉS, J. A. (1951). *Plantas medicinales de Asturias*. Oviedo: Instituto de Estudios Asturianos.
5. ARTECHE GARCIA, A.; FERNÁNDEZ LÓPEZ, J. A.; GÜENECHA SALAZAR, J. I.; VANACLOTXA VANACLOTXA, B. (1992) *Fitoterapia, Vademecum de prescripción*. Bilbao: Citape SL.
6. BACHILLER, L. I.; FDEZ.-GUIASOLA MUÑIZ, F. J. (1999). "La cirigüeña una planta de uso tradicional de plena actualidad". *Libro de Actas del II Congreso Internacional de fitoterapia y técnicas afines "Ciudad de Oviedo"*. Oviedo: SAF.
7. CASAL, G. (1988). *Historia natural y médica del Principado de Asturias*. (Edición fascimil de la Edición Príncipe de 1762). Oviedo: Consejería de Educación Cultura y Deportes.
8. CONCEPCIÓN SUAREZ, J. (2001) *Las plantas medicinales: los remedios caseros*. [en línea] <<http://www.xulio.cs.com/plantaspiel.htm>>. [Ileú: 28/feb/2006].
9. D'ANDRÉS, R. (1991). *Diccionariu temáticu asturianu*. Xixón: Alborá Llibros.
10. FERNÁNDEZ GARCÍA, J. (1996). *Curanderos y santos sanadores. Curanderismo y medicina popular en Asturias* (2ª Edición). Oviedo: CEA.
11. JUNCEDA AVELLO, E. (1987). *Medicina popular en Asturias*. Oviedo: IDEA.
12. LASTRA, J. J.; BACHILLER, L. I. (1997). *Plantas medicinales en Asturias y la cornisa cantábrica*. Gijón: Ediciones Trea SL
13. MARTÍNEZ, V. (2006). *Botanical* [en línea] <<http://www.botanical-online.com>> [Ileú: 28/feb/2006].
14. MAYOR, M.; DIAZ, T. E. (1983). *La flora asturiana* (4ª Reimpresión). Salinas: Ayalga Ediciones.
15. PORTAL HEVIA, L. (2005). *Secretos de Pandenes*. Uviéu: Trabe.
16. RICO-AVELLO, C. (1964). *El bable y la medicina*. Oviedo: Instituto de Estudios Asturianos.
17. SANCHEZ VICENTE, X. X. (1998). "Algunas notas sobre la paremiología asturiana relativa al cuerpo, la enfermedad y la alimentación". *La medicina popular asturiana. XIII Congreso Nacional de Médicos Escritores* (pág. 381-395). Oviedo: Joaquín Fdez. Gª y Antonio Castillo Ojugas Editores.
18. TOLIVAR FAES, J. (1976) *Historia de la medicina en Asturias*. Gijón: Ayalga Ediciones.

Francisco Fdez.-Guisasola Muñiz es Licenciado en Medicina y Cirugía por la Universidad de Oviedo. Médico Naturista, es Master en Acupuntura por la Universidad de Zaragoza y Especialista en Homeopatía por la Universidad de Valladolid. Actualmente es Presidente la Scmahn del ICOM de Asturias.